

Gereformeerde Kerk Bellville – 7 April 2019 – Aand

Sing vooraf staande: Psalm 4:3, 4 (p. 15)

- 3 Wil jul aan Hom 'n offer gewee? / Die offer wat die HEER aanskou,
is in opregtheid reg te lewe, / en Hom alleenlik aan te klewe, / op Hom alleen jul hoop te bou.
Hoe baie vra terneergeboë: / Waar vind ons ooit die ware goed? / Verhef oor ons u Vaderoë,
sien op ons neer in mededoë, / verlig ons hart en ons gemoed!
- 4 U het my hart meer vreug gegewe / as ander smaak in volop-tyd,
as hul deur skyngeluk verhewe, / by mos en koring lustig lewe
en fees hou in kortstondigheid. / Ek sal gerus gaan slaap in vrede / en ongestoord lê ek my neer;
want U alleen verhoor my bede, / U waak oor my in teënhede, / dat ek kan veilig woon, o HEER!

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Loflied: Psalm 36:2, 3 (p. 179)

- 2 U goedheid, HEER, is hemelhoog; / u waarheid tot die wolkeboog; / u reg sal nooit begewe,
maar staan soos berge, vas van voet; / u oordeel is 'n diepe vloed; / U sorg vir al wat lewe.
Hoe kost'lik is u guns, o God! / Hoe vlug die mensekinders tot / u vleuels vir beskerming!
Hul smaak die vette van u huis; / U laaf hul uit 'n stroom wat bruis / uit dieptes van ontferming.
- 3 Van al wat leef, is U die bron; / van alle lig, die eewge son / wat afstraal in ons oë.
HEER, laat u reg en goedheid wees / oor wie opreg u ken en vrees / en steun op u vermoë:
laat trotse voet my nooit vertrap, / nóg bouse hand in ballingskap / my dwing om rond te swerwe!
Daar val die werkers van die kwaad / vir altyd in 'n jammerstaat / waarin hul magt'loos sterwe.

Gebed

Psalm 25:4, 5 (p. 116)

- 4 God is goed in al sy handel, / en sy pad is enkel reg;
daarom laat Hy sondaars wandel / in die waarheid van sy weg.
Hy sal met sy hand hul lei / wat verdwaal was en verlore;
wie sagmoedig is, laat Hy / wandel op sy regte spore.
- 5 Ja, Gods weg is goedheid, klaarheid, / en sy weg altyd getrou
vir wie wandel in sy waarheid / en op sy beloftes bou.
Wil my dan, u Naam ter eer, / al my sondeskuld vergewe;
want ek het teen U, o HEER, / swaar en menigmaal misdrewe!

Skriflesing: Genesis 18:16-33; Nederlandse Geloofsbelydenis, Artikel 1

Kernvers: Genesis 18:23-25

En Abraham het nader gekom en gesê: Sal U ook die regverdige saam met die goddelose ombring? Miskien is daar vyftig regverdiges binne-in die stad; sal U hulle ook ombring en die plek nie spaar ter wille van die vyftig regverdiges wat daarin is nie? Laat dit ver van U wees om so iets te doen: om die regverdige saam met die goddelose om te bring, sodat die regverdige gelyk is met die goddelose. Laat dit ver van U wees! Sal die Regter van die ganse aarde geen reg doen nie?
(Genesis 18:23-25 AFR53)

Nederlandse Geloofsbelydenis

Artikel 1: Die enige God

Ons glo almal met die hart en bely met die mond dat daar 'n enige en enkelvoudige geestelike Wese is wat ons God noem. Hy is ewig, onbegryplik, onsienlik, onveranderlik, oneindig, almagtig, volkome wys, regverdig, goed en die alleroorvloedigste fontein van alles wat goed is.

2 Kor 3:17; Joh 4:24; Jes 40:14.

Tema: Die Here betrek die gelowige in sy regverdige regering

Geliefdes in ons Here Jesus Christus, baie gelowiges worstel met dieselfde vrae as waarmee Abraham geworstel het toe die Here sy besluit oor Sodom aan hom bekend maak het. Is God regverdig om 'n hele stad te verwoes, en dan nog die regverdiges saam met die kwaaddoeners te tref? Weeg die kwaad van die meerderheid dan swaarder as die getrouheid van die bietjie regverdiges? Sal ons gebed enige verskil maak aan God se regering van die wêreld? Hierdie is oeroue vrae wat deur Christene die wêreld oor gevra word. Dit is vrae wat gaan oor die Wese van God en die verantwoordelikheid van die gelowiges.

In vers 16 tot 21 openbaar God al iets oor sy Wese en werk aan ons en ook iets oor die gelowiges se verantwoordelikheid. Daar hoor ons dat God met feite werk. Die Here sal sondaars nie straf voordat Hy self 'n bevinding oor die sonde maak het nie. Die Here sit dit vir Abraham uiteen omdat die gelowige 'n verantwoordelikheid het. Gelowiges se verantwoordelikheid is om die kinders en ander mense te leer hoe regverdig God is en hoe regverdig Hy te werk gaan.

Nou gaan die Here verder met sy openbaring in verband met sy Wese en ons verantwoordelikheid. Nadat die Here aan Abraham gesê het dat Hy na Sodom toe afgaan om ondersoek in te stel, het die twee engele van die Here verder na Sodom toe gereis. Die Here het egter by Abraham bly staan. Die Here het Sodom se sonde aan Abraham genoem, nie net sodat Abraham en sy nageslag moet weet dat God die sonde haat nie. En die Here het ook nie by Abraham bly staan omdat Hy graag in Abraham se geselskap wou wees nie. God het Sodom se sonde genoem en by Abraham bly staan, want Hy wou hoor hoe die liefde en ontferming wat Hy al aan Abraham bewys het, in hom neerslag gevind het. Die Here het vir Abraham met sy woorde en optrede genooi om gebed te doen vir Sodom en Gomorra.

Abraham kon natuurlik soveel anders gehandel het, want hy is net 'n sondaarsmens. Hy kon deur die kennis oor wat die Here in Sodom gaan doen, homself verhef het. Hy kon homself hoogmoedig gestel het bo die sondige Sodom. Hy het immers ook geweet hoe dit in Sodom gaan. Lot het daar gewoon. Hy kon in eiegeregtigheid bygevoeg het dat dit die ongehoor-same Sodom se verdiende loon sal wees as die Here hulle verdelg. Maar nee! Abraham het deernis vir mense en hy is besorg oor die sondige stede. Die Heilige Gees dring Abraham om met opregte bewoëheid vir die regverdiges by God in te tree.

Sal U ook die regverdige saam met die goddelose ombring? Miskien is daar vyftig regverdiges binne-in die stad; sal U hulle ook ombring en die plek nie spaar ter wille van die vyftig regverdiges wat daarin is nie? (Genesis 18:23-24 AFR53)

Abraham is 'n gunsgenoot van God. Daarom het die Here sy besluit aangaande Sodom aan hom bekend maak. Abraham gebruik hierdie verhouding wat die Here met hom het

om met vrymoedigheid tot God te nader. Here, U is die Regter van die hele aarde. U het seggen-skap ook oor Sodom en Gomorra. As U Sodom met die verdiende oordeel tref oor hulle sonde, is U regverdig. Maar U sal tog verseker reg laat geskied ook oor hierdie stede. U sal tog nie onregverdig wees en die regverdiges saam met die goddeloses ombring nie, al is daar net vyftig regverdiges in die stad?

Ons moet onthou: Regverdige mense is nie sondeloos en volmaak nie. Regverdige mense is mense wat deur God se groot genade hulleself nie aan hulle eie grenslose sondige begeertes of aan die sondigheid van die wêreld oorgegee het nie.

Op hierdie smeekgebed hoor Abraham toe die lofwaardige antwoord uit die mond van die Here self:

As Ek in Sodom vyftig regverdiges vind binne-in die stad, dan sal Ek die hele plek spaar om hulle ontwil. (Genesis 18:26 AFR53).

Ons God is regverdig. Hy sal die reg laat geskied. Hy sal nie die regverdiges op dieselfde manier as die goddeloses behandel nie. En ter wille van die regverdiges sal Hy ook aan die goddeloses genade betoon deur die hele plek te spaar. Die regverdiges sal tot seën wees vir die goddeloses.

Hierop gaan Abraham se vrymoedigheid verder. Miskien is daar nie eers vyftig regverdiges nie. Dalk is daar net vyf en veertig of veertig of dertig ... of net tien regverdiges in die hele Sodom en Gomorra. Sal U dan steeds die stad vernietig? En telkens hoor Abraham die antwoord. Oor die regverdiges sal Ek die plek nie vernietig nie. Selfs al is daar net tien regverdiges in die hele stad te vinde, sal Ek die hele plek spaar.

Hoor u hoe groot die genade van ons God is? Voorwaar, God is regverdig. Ons God is begaan oor die gelowiges wat saam met die goddeloses moet ly. Hy is so begaan oor hulle dat Hy selfs bereid is om die verdiende oordeel oor die sonde af te keer. Hy is selfs bereid om goddelose mense wie se sonde ten hemele skree, te spaar, as daar selfs so min as tien regverdiges in die stad te vind is. Gelowiges is immers op die aarde, in die eerste plek, om dank aan God te bewys, en in die tweede plek om tot seën te wees vir die mense rondom hulle. Die feit dat die regverdiges gewillig en bereid is om vir hulle God te leef, strek tot seën vir die ongelowiges. Die kwaad van die meerderheid weeg beslis nie swaarder as die getrouheid van die klein klompie gelowiges nie. Gelowiges is die sout van die aarde en 'n mens het nie baie sout nodig om smaak te gee nie. Daarom het ons gelowiges, al is ons net 'n handjie vol, 'n groot rol om te vervul in 'n wêreld vol kwaad en geweld.

Maar dan moet die gelowiges waarlik sout van die aarde en 'n lig vir die wêreld wees. 'n Stad of 'n land kan nie op God se genade aanspraak maak as die gelowiges net lippediens verrig nie. Om net te sê dat jy glo, is nie genoeg nie. Wat jy sê, moet in jou hele menswees duidelik word. As jy sê dat jy 'n Christen is, moet jy met jou hele hart, met jou hele siel, met jou hele verstand en met al jou kragte Christen wees. Sout moet waaragtig sout wees, anders kan dit nie smaak gee of bederf teenwerk nie.

Ons bekla maklik en graag ons benoudheid en angs oor al die onreg, geweld en goddeloosheid in ons eie land. Maar op grond daarvan dat die getrouheid van 'n klein klompie gelowiges baie swaar by God weeg, moet ons onself afvra: Is ons werklik sout en lig soos wat ons God en Verlosser bedoel dat ons moet wees? Of bedryf ons maar 'n lippediens aan God? Is ons werklik sout en lig omdat God nog soveel geduld en genadetyd aan hierdie land van ons gee? Onthou, dit is gedagtig aan sy ware kinders dat

God nog nie hierdie land en wêreld totaal vernietig het nie. Omdat Abraham geweet het dat God reg-verdig is en weet dat God se regverdigheid inhou dat Hy die sonde nie kan verdra nie, daarom het hy tot die Here gebid oor die stad Sodom. Ons ken Hom mos ook as regverdig. Ons bely dit dan hier in die eerste artikel van ons belydenis. Bid ons nog vir ons land en stad tot die Here omdat ons Hom as die regverdige God ken?

Ons hoor ook van die Here se genade in verband met die gebede van gelowiges. Die Here het met sy woorde en optrede Abraham opgeroep om voorbidding te doen vir die stede. God wou hê dat Abraham voorspraak moes doen vir die twee stede en Hy wou ook hê dat Abraham so moes aanhou, ja, selfs tot ses keer by die Here smeek om die stede te spaar.

Die Here word nie moeg vir ons smeking nie. Hy wil juis dat ons Hom aanhoudend moet vra. Daaruit blyk dit dat ons van die Here afhanklik is. Hy wil trouens ook hê dat ons voorbidding moet doen. Bid vir alle mense dat God hulle harte sal aanraak met sy Gees en Woord. Bid dat die afgedwaaldes en afvalliges tot die besef sal kom dat die lewe net by God in Christus te vinde is. Bid dat God nog genadetyd aan ons sal skenk sodat ons waarlik soos sout en lig in hierdie land sal lewe om aan die afgedwaaldes en afvalliges Christus te kan verkondig. Omdat God voorbidding van ons verlang, moet ons versigtig wees dat ons nie in ons gebede te veel op onself ingestel raak nie. Wanneer ons te veel op onself ingestel is in ons gebede, vergeet ons van ons verantwoordelikheid ten opsigte van die wêreld.

Maar nou kom die vraag by 'n mens op: Sal ons voorbidding enige verskil aan God se regering maak? Het Abraham se voorbidding enige verskil aan God se regering gemaak ...? Lees 'n mens Genesis 19, besef 'n mens dat Abraham se gebed nie God se raad verander het nie. Maar het die Here dan Abraham se gebed verhoor as Hy die stede in elk geval met vuur en swael getref het? Ja, die Here het Abraham se gebed verhoor. Daar was nie eers tien regverdiges in die stad sodat die Here die stad kon spaar nie. Maar die Here het die stede nie met die oordeel getref voordat Lot en sy vrou en dogters daaruit weggevlug het nie. Ter wille van Lot en sy dogters het die Here die oordeel teruggehou totdat hulle veilig buite die stad was. Die vrou van Lot het egter nie veiligheid bereik nie, want haar hart was aan die stad verkleef. Daarom het die oordeel van die Here haar ook getref. Sy was nie een van die regverdiges nie. Aan die einde van Genesis 19 sien ons dat daar op die ou end net een regverdige in Sodom was – Lot.

Tog moet ons versigtig wees met die vraag oor ons gebede en God se raadsplan. Die Here het nie sy raadsplan aan Abraham bekend gemaak nie. Hy het slegs aan Abraham gesê dat Sodom se sonde baie groot is. Nooit het God voor Abraham se gebed gesê dat Hy Sodom en Gomorra gaan verdelg nie. Maar omdat Abraham God ken as die heilige en regverdige God van die hele aarde en omdat hy self geweet het dat Sodom se mense hulle aan die grensloosheid van die sonde oorgegee het, het hy geweet die kans is groot dat God hulle sal straf. Daarom het hy hom verootmoedig en God gesmeek om genade vir die twee stede te hê. Abraham het nie God se raadsplan geken nie.

Ons weet ook dat die Here op ander plekke in die Skrif openbaar dat sy raad vas bly staan. Wat die Here besluit het, sal gebeur. Nou bly die vraag steeds: Het ons voorspraak enige effek? Geliefdes, juis omdat ons nie God se raadsplan ken nie, want dit is sy verborge wil, is die vraag of ons gebede 'n effek op Hom het, ongeldig. God wil nie hê dat ons sy verborge wil ken nie. Hy wil hê dat ons sal doen wat Hy aan ons geopenbaar het. Hy wil dat ons voorbidding moet doen. Want, hoewel ons gebede nie sy raad verander nie, voer God tog sy raad uit in gemeenskap met sy kinders. Daarom het ons gebed 'n plek in God se regering.

'n Verdere saak wat uit Abraham se voorbidding duidelik word, is die ootmoed wat hy openbaar. Hy bid wel met baie vrymoedigheid vir die twee stede, maar vergeet nie een oomblik dat dit 'n groot stuk genade is om by God om uitkoms te smeek nie. Abraham besef dat hy maar net stof en as is, daarom is dit soveel te meer genade om dit te kan waag om met die Here te praat. Abraham se ootmoed bring hom daartoe dat hy die regverdigheid van God vooropstel in sy gebed. God is almagtig en heilig, daarom sal Hy regverdig wees om die sonde met die verdiende oordeel te tref. Ondergeskik aan die regverdigheid van God is Abraham se begeerte na die genade van God vir die stede. Omdat God regverdig is, smeek Abraham om genade vir die stede ter wille van die regverdiges daarin.

Die gelowige wat 'n intieme, persoonlike verhouding met die Here ons God het, sal ook met groot vrymoedigheid God in gebed kan nader. Maar omdat die Heilige Gees ons in so 'n intieme, persoonlike verhouding met God laat groei, bring dit mee dat ons besef hoe 'n groot genade dit is om tot die almagtige, regverdige God te mag bid. Ons buig dan soveel te meer dieper neer in ons siele, want ons besef ons is maar net stof en as wat die voorreg het om tot God in gebed te nader.

Gelowige, jy is ook 'n gunsgenoot van God. In sy groot genade het Hy ook aan jou 'n kykie op sy Wese en werk gegee. Hy laat jou sien hoe jou lewe en gebede in sy regering ingesluit is. Hy wys jou op jou verantwoordelikheid. Jy weet dat God regverdig is. Hy laat die sonde nie ongestraf bly nie. Jy weet ook dat Hy 'n ander weg gevolg het om die kwaad te oorwin sodat mense gered kan word pleks van dat al die mense op die aarde verdelg word. Omdat Hy die sondaar in die lewe wil hou, het Hy die straf op Homself geneem toe Hy sy Seun aan die kruis laat spyker het. Jesus Christus het jou lyding op Hom geneem. Oor jou oortredings is Hy deurboor en deur sy wonde het daar vir jou genesing gekom. Dit het God gedoen omdat Hy God is en nie 'n mens nie. Omdat Hy God is, het Hy die verdiende en regverdige oordeel afgekeer en genade betoon.

Omdat ek en jy so baie genade en liefde ontvang het, wee ons as ons hierdie liefde en genade vir onself hou. Wee ons as ons onself in hoogmoed verhef en vermakerig spot oor die regverdige oordeel wat die goddeloses aan die einde van die tyd gaan tref.

Mag die Gees ons so vernuwe dat ons nog meer en meer 'n intieme, persoonlike verhouding met die almagtige God beleef. Dan sal ons ook met vrymoedigheid sout en lig wees, met vrymoedigheid God nader in gebed vir die dorp en land waarin ons woon. En in diepe ootmoed sal ons besef watter genade dit is om tot God te mag bid, want God het ons lewe en ons gebede in sy regverdige regering ingesluit.

Amen!

Slotgebed

Formulier vir die bevestiging van ouderlinge en diakens

Psalm 115:7, 8 (p. 565)

- 7 God die HEER het ons gedenk / na sy troue bondsbestel.
Seëninge sal Hy skenk / aan die huis van Israel;
seëninge van die HEER / daal op Arons kinders neer.
- 8 Hy sal seën wie Hom vrees, / groot en klein wat op Hom wag;
ja, Hy sal hul allermees / seën in hul nageslag.
Hy wat spreek, en 't het geskied, / sal sy seen oor hul gebied.

Psalm 116:7, 9, 10 (p. 570)

- 7 Wat kan 'k die HEER vir al sy guns vergeld? / Wat kan 'k Hom bring uit dank vir sy genade?
Ek sal Hom prys vir sy verlossingsdade / en by die kelk van heil sy Naam vermeld.
- 9 Ag, HEER, ek is, o ja, ek is u kneg, / seun van u diensmaagd, in u diens gebore:
my bande is los; vir hoër diens verkore, / bring ek die offers, aan U toegeseg.
- 10 Ek sal u Naam met dankerkent'nis prys / te midde van die feestelike skare.
Jerusalem, ek hoor om jou altare / die lofgeluid wat tot Gods eer verrys.

Die genade van ons Here Jesus Christus, die liefde God die Vader en die gemeenskap van die Heilige Gees sal met elkeen van julle wees en bly.

Amen.

Ds Coenraad Vrey
Gereformeerde Kerk Bellville
7 April 2019